

劉畚山在定南縣東北一百里與廣東龍川縣接界

項山在長寧縣東南五十里閩廣之交有雙峰飛瀑之勝縣南五十里有盤龍山上有流泉古松十餘中藏梵刹

寒地山在長寧縣東五十里林木蒼鬱紆迴二十餘里中有村落盛暑夜如深秋故名

帽山在長寧縣西七十里一名大帽嶂盤亘百餘里舊為葉寇巢穴稍南有鈴山高聳秀拔為黃鄉羣山之冠

官谿山在長寧縣北三十里棘箐叢深昔為盜藪至今天雨陰霾嘗有鬼物嘯呼

佛日峰在府城貢水東舊有塵外雲端駒巖一憩吸江五亭俱廢近復構塵外亭其下為馬祖巖相傳道一始欲棲此一夕鬼為築垣歎曰學道不至乃為邪鬼所測因棄去居